

1622

14<sup>e</sup> Jan. 1712.

24

L'ANTI-REFORME,

OV

RESPONSE A VN LIBELLE  
INTITVLE,

LA REFORMATION  
DE CE ROYAUME.

M. DC. XXIII.

Case


F

39

326

THE NEWBERRY  
LIBRARY

16232



# L'ANTIREFORME.



Hose déplorable, que nous sommes aujourd'hui en vn siecle si peruers; où la calomnie tient le haut bout, & la mesdisance possède le premier rang. Tout le monde se donne aujourd'hui vn tel aduantage, qu'il semble estre loisible à tous de parler & d'escrire indifferemment de toutes choses, pourueu que la plume puisse tracer les fantosmes qui s'engendrent dans leur esprit. Voicy vn nouveau Reformateur qui est arriué à Paris depuis deux iours, lequel seul se croit plus sage & plus prudent que tous ceux qui gouvernent & qui ont charge de la Monarchie, on n'attendoit plus que son aduis pour assembler les Estats & reformer tout l'Empire François, mais ou sont aujourd'hui nos esprits, endurons nous ces Monstres desnaturez & ces auortons viure plus long temps parmy nous: N'est-ce pas à faire à vne personne de neant, de qui on ignore le nom & le sexe, de se mesler dans les affaires d'Estat, & de reformer les actions du Roy? Mais qui m'amene ces nouveaux reformateurs; Fait il pas beau veoir Monsieur le



Singe à se moquer de tous les François, & parler sans exception ny distinction des grands & des petits ? Tu auois bien du loisir quant tu as basti ceste autentique Reformation : car tu t'es moignes bien par la suite du discours qu'il y a bien peu de ceruelle dans ta t'este.

Toutesfois à fin qu'il ne semble pas à veoir que ie te veuille accuser à faux, ie te veux mon-  
strer de lourdes fautes qu'il te conuient reformer en ta *Reforme*.

Premierement, tu t'attaques directement au Roy, luy remonstrant puis qu'il a voulu estre appelé Loys le Iuste, qu'il en doit faire paroistre les effects, Misérable & desnature, as-tu remarqué depuis l'heureux aduenement du Roy à la Couronne, qu'il ait fait aucune iniustice ? n'auons nous pas veu ce Royaume tout demembré & qui ne respiroit plus qu'une decadence generale, estre remis & reintegré en son premier estat ? quelle année peux-tu remarquer en tes Ephemerides ou ce ieune Prince qui en l'auril de ses ans: comme vn autre Hercule a terracé les Monstres qui le vouloient attaquer, n'ait sorti des effects admirables de sa grandeur, de sa clemence & de sa iustice ?

Tu dis qu'il doit faire vne reformation generale par tout son Royaume : es-tu Conseiller d'Etat ou des guerres ?

Ie crois pour moy que tu es Hermaphrodite, ny l'un ny l'autre ; Tu t'estimes donques au dessus de tous les grands Seigneurs & Princes de la Cour. Mais dy moy ie te prie à quoy à trauaillé le Roy depuis qu'il regne sur nous, qu'à restituer

ce Royaume en sa premiere splendeur. Quel  
 soin ny a apporté la Royne sa mere pendant sa  
 minorité, de combien de traueses s'est-il veu  
 enuêloppé, & de combien d'ennemis a-il triom-  
 phé pendant son ieune aage, lis toute l'antiquité,  
 retourne & feuillettes toutes les histoires, tu ne  
 trouueras point vn ieune Prince qui ait tant  
 fait paroistre d'effets de sa valeur, que ce  
 grand Monarque, qui peut dire auoir fait en sa  
 ieunesse ce que les autres n'ont peu faire en leur  
 vieillesse, & aiors que la prudence auoit plus de  
 vigueur en eux, il a mis à chef vne entreprise en  
 ces deux dernières années, que ses predecesseurs  
 n'ont peu faire en cinquante ans. A combien de  
 perils, de hazards, de dâgers s'est il prodigué vo-  
 lontairement pour remettre son pays en son an-  
 cien lustre. Que peux tu souhaiter qu'il n'eust  
 fait pour engêdrer vn eternal repos dans le Roy-  
 aume? n'est-il pas comme le Pelican, lequel fait  
 viure ses pouffins aux despends de sa vie, & les  
 nourrit de son sang? Depuis l'an 1620. que c'est  
 inuincible Monarque a fait esclorre les pre-  
 miers traits de sa valeur, & a enfanté au iour les  
 premieres marques de son courage, en quels pe-  
 rils ne s'est il librement exposé? il alla à Caen,  
 au milieu d'une gresse de mousquetades, qui  
 pleuuoit sur luy, il alla au Pont de Cé, & en Bear,  
 où il faisoit tres-dangereux. Depuis il commen-  
 ça ceste grande guerre des Rebelles, attiré par  
 leurs factions, où il a gagné plus de cent fortes  
 places, lesquelles estoient dans leurs mains, &  
 parmi tous ces voyages ne trouues tu aucune  
 iustice: N'estoit-ce pas à fin de rafermir le Roy-



6

aume, & le remettre en son premier ordre? ap-  
pelles-tu cela iniustice, & ne faire aucunes actiōs  
qui respondent à ce nom de *Louys le Iuste*.

Encor tu es si audacieux de dire que s'il ne  
poursuit la guerre qu'il a commencee, & qu'il ne  
reformeson Royaume, qu'au lieu de *Louys le  
Iuste*, il est à craindre qu'il ne soit nommé *Louys  
le Simple*: Parole outrageuse en ta bouche?  
Crois-tu que les ans & les siecles puissent des-  
rober à ce grand Roy le nom de *Iuste*? puis qu'il  
en faict paroistre de si belles & admirables  
actions, où sont tes sens, que crois-tu que le peu-  
ple de France dise de toy? quels encomes &  
louanges penses-tu qu'on te donne pour auoir  
tant trauaillé en ta Reforme? Quels ressenti-  
mens auront les estrangers des François, puis  
que la France nourrit dans son sein de tels Mon-  
stres. Hidre furieuse qui exhale de ta gorge de si  
outrageux discours: puisse aduenir que le ciel  
brādisse les foudres de son courroux sur ta teste  
pour t'embraser viuant, & t'abîmer au plus  
creux de l'enfer, puis que tu vses de telles paro-  
les enuers ton Roy qui est si doux, si bon & si  
clement: crois-tu s'il eut peu ramener ses subiets  
Rebelles au sentier de leur deuoir par la dou-  
ceur qu'il y eut employé les armes: Vn Medecin  
apporte tous les remedes qu'il peut excogiter les  
plus doux & les plus salutaires, pour appaiser le  
mal deuant que d'y apporter les ferremens. Ia-  
mais le Roy n'eut entrepris la guerre s'il n'eust  
esté poussé par les continuelles plaintes de ses  
pauvres subiets Catholiques qui ne pouuoient à  
peine respirer sous les esclandres dont ils estoient

agitez : mais maintenant tout ce differend est terminé graces à Dieu. La paix a rabaislé les fureurs de la guerre : Tout est reüni en son ancien lustre, & l'œconomie renuersee par le moyen de la guerre est remise en son ordre. Que desires-tu que le Roy faces d'auantage, tu veux qu'il poursuiue la guerre, sans doute que tu es vn de ces antiens Ligueurs, & que quelque furie t'a engendré sur le Caucaise, puis que tu fais plus d'estat des orages de la guerre, que du calme & bonafse de la paix.

Mais l'impudence à vn homme de dire que le Roy ne sera iamais asseuré dans son Trosne, s'il n'oste toutes les places fortes que tiennent ceux de la Religion pretenduë. Quelles places ont ils maintenant que la Rochelle & Montauban, où sont six vingts villes qu'ils detenoient, où est le Bearn, & ceste forteresse imprenable de Nauarrin, où est reduite leur puissance, où sont leurs forces, en deux villes, lesquelles à ce que tu dis peuuent faire soustener vn Royaume de France, & s'opposer à vn Louys le luste, tu ne sçais où ton esprit s'estrauague.

Tu dis que les Huguenots couperont la gorge au Roy, miserable auorton, ceste conception peut-elle tomber en ton esprit ? Tu tesmoignes bien que tu n'es basti que de sang, & que tu ne vis que de carnage. Crois-tu que les Catholiques soient morts, & que si on vouloit menacer sa Majesté du moindre effort, que tout le Royaume ne se souleuaist à sa deffence ? Sçache que le Roy de France est aussi puissant qu'il fut iamais : Toutes les nations tremblent



Sous le bruit de ses armes, & ny a lieu ny contree ou la grandeur de son courage ne verse la terreur à ceux qui entendent le bruit de ses victoires.

Tu donnes des enseignemens pour conduire vne armee naualle, il te les faudroit faire prattiquer à toy-mesme, & te mettre dans vne galere à tirer à la rame, on verroit alors si ta Reforme auroit sorti quelque effect.

De nous menacer de la descente du Prince de Galle & des Anglois en France, c'est chanter vne vieille querelle comme les grenouilles, & *veterem in limo ranæ cecinere querelam*. Le Roy d'Angleterre peut bien scauoir par la lecture de ses Annalles s'il faict bon en France. Crois-tu que tant de batailles qu'ont gagnes les François sur ceste Nation, luy ayent laissé vn desir de retourner en France? Ce seroit venir rechercher les esperons de ses compagnons qui y ont laissé iadis les bottes.

Quant à ce que tu dis que les<sup>r</sup> Thresoriers, Financiers, & Commissaires des guerres ont volé le Roy, en tout ceste expedition il faut que ie confesse que ie ne scay que repliquer, car ie ny estois pas, s'ils l'ont fait le mal en tombera sur eux.

Tout ce qui est bon à prendre (comme on dit est bon à rendre.) Mais ce n'est point à toy quin'es nullement interessé en ceste affaire de les reformer. Le Conseil du Roy est assez puissant pour ce faire.

De dire que le Roy fournissoit vne grande somme de deniers pour soudoyer son armee & qu'on



qu'on luy voloit toutes les môstres des soldats, ie m'en rapporte à ce qui en est, si quelqu'un s'est serui de ceste inuention pour s'enrichir. Ie diray avec l'autre, *sursum corda*.

Mais bien souuent la verité engendre le mespris, on ne doit point dire tout ce qu'on scait, le Roy n'a que faire de ton aduis pour faire rendre compte aux finâciers de l'argent qu'ils ont employé en son voyage, il est plus qu'aduerti de toutes les fourbes qui s'y sont iouées, & scaura bien punir ceux qui y ont apporté quelque manquement, sans que tu l'en aduertisse.

Pour ce qui est du luxe, & de la despence qui se faict maintenant en France, ie suis en cecy de ton opinion, & te passeray procuration quant tu voudras, mais le mal n'est encore si inueteré qu'il y faille apporter les ferremens. Le Conseil du Roy y dōnera ordre, & ne laissera long temps son Royaume en ces bombances superflues.

Ce qui est tres odieux en ton liure, est que tu menaces le Roy à chaque bout de champ d'estre nommé Louys le simple. Voila vne parole qui te coustera la vie, si iamais on te pouuoit recognoistre: perfide & desloyal subiect, est-ce là l'honneur & le respect que tu dois à ton Prince? sont-ce là les encomes & les tiltres de loüanges que tu luy donnes: Ceste parole peut-elle sortir de la bouche d'un François. Ie croyois pour moy que cela vinst plustost de Tigre ou Lyon furieux qui a voulu vomir ce qu'il auoit de rage par ses infames escrits.

Mais tu ne t'attaques pas seulement au Roy,

ton respect transcendant qui se croit estre esle-  
 ué en l'Apogee de tout ce qu'on peut sçauoir,  
 va par tout les ordres visiter les trois Estats, &  
 veut reformer tout le peuple de France à sa fan-  
 tasie. Ta Reformation s'estend mesmes sur les  
 gens d'Eglise, lesquels tu accuse d'indeuotion,  
 d'incapabilité, & de ce qu'ils ne vivent sainte-  
 ment, querelle tant de fois rebatuë que ie suis  
 honteux de te respondre. Mais quelle indeuo-  
 tion remarque tu aux Prelats de la France  
 (principalement de ceux qui ont quelque pres-  
 ceance en l'Eglise) qui ne satisfont plainement  
 à ce que leur oblige leur deuoir. As tu iamais  
 veu siecle où la vraye Religion fut mieux reco-  
 gnuë, & l'Eglise mieux cultiuee. Où sont ces  
 Euesques, ces Abbez, ces Religieux & Religieu-  
 ses vieieux que tu dis, il semble à t'ouyr que la  
 France soit proche de sa sepulture, & qu'il ny  
 ait aucune Religion en ce Royaume. Nous n'i-  
 gnorons pas qu'il ny ait tousiours quelque grain  
 de zizanie parmi le froment. Dans la compa-  
 gnie des Apostres qui n'estoient que douze, il y  
 auoit bien vn Iudas. Mais combien auons nous  
 d'ordres de Religieux qui vivent saintement,  
 parmi nous. Tu te ressouuiens bien des vices qui  
 regnent parmi eux : Mais tu ne parle point des  
 actiōs vertueuses qui s'y pratiquēt tous les iours  
 des austeritez qui se font dans les Religions,  
 qui sont sous la reforme. Tu ne parles point du  
 filēce & des oraisons des Chartreux, des austeri-  
 tez des Capucins & Fueillāns, des Meditations  
 des Carmes Deschaullēz, de la vie Monastique



des Minimés, de la pieté & integrité de tant de Conuents de filles enfermées, qui comme des autres Vestalles, conseruent le feu sacré de leur chasteté & pudicité au supreme moteur des Astres. Et de tant & tant de Religieux prestres qui sont en nostre Eglise à extirper les heresies & y engendrer la vertu, tu n'en fais aucune mention. Crois-tu que parmi tant de vices que toy & tes compagnons exercent tous les iours, ceste ville peust subsister vne heure sans estre enseuelie & abismée dans ses propres ruines, si ce n'estoit la bonne vie de quelques vns qui contrebalancent le iuste courroux du Ciel par leurs œuvres pieuses, & desarment le bras foudroyans du grand Dieu par leurs humbles prieres?

Passons plus auant nous rencontrerons des marques insupportables de ton impudence. N'est-ce pas bien à faire à toy petit ver de terre, de reformer les actions du Roy, & de limiter les plaisirs qu'il peut prendre honnestement? Tu es si outrecuidé de l'aduertir par ta reformation qu'il se doit reformer soy mesme, & chasser tant de chiens inutiles qu'il a pour la chasse: mais où auois tu les sens quand tu donnois ces cōseils, ie ne me persuade autrement que tu n'ayes en ce iour le cerueau thimbré d'une fureur bachique, puis que tu en fais naistre des effets si demonstratifs tu veux donc borner & limiter les honnestes recreations d'un Roy, tu veux luy tailler ses morceaux cela seroit bon en Espagne en Pologne, & aux autres Pays où les Roys

sont captifs sous les volontez de leurs subiects, mais en France, où la liberté est nostre plus précieux gage, tes aduertissemens sont insupportables. Quel plus beau divertissement & passe-temps veux tu qu'un Roy prenne qu'à la chasse, y a il exercice plus Royal, la chasse chasse la tristesse de nos esprits, dissipe les mauuaises humeurs perpetuë, nos sens & les rends solides, la chasse rassereine nostre cœur, resiouyt nos organes tant interieurs qu'exterieurs & facilite celuy qui s'y addonne à des actions bië plus releuées, chasse est vn simulateur & vn ombre de la guerre, qui excelle en l'un est parfait en l'autre, ceste habitude qu'on s'acquiert par vn exercice si recreatif, fait naistre en nos ames vn desir d'acquérir de la gloire & des triumphes dans les combats & de moissonner de vrais lauriers sous les estendars de Mars. Te peux tu plaindre, que le Roy n'eust donné des preuues de ce que ie dis? n'a il point tellement marié la chasse avec la guerre, qu'il s'est enfin rendu inflexible aux coups indomptables, à la peine infatigable aux dāgers inexpugnables, aux perils & la terreur de tous ses ennemis. Ie serois trop prolix si ie voulois prendre tes folies & imaginations par le menu, & respondre à chaque chef que tu y as faict entrer. Ie passe outre, aussi dit-on ordinairement qu'à ta lotte demande il n'y faut point de responce.

Tu crois auoir trouuë la pie au nid quant tu parle des Parlemens, & que tu fais tourner tes discours à tort & à trauers, sur les Iusticiers &



Administrateurs des Cours souveraines, là tu dis estre le grand mal & où on doit principalement se servir de ta Reforme, où sont tes yeux monstre infatué, ta langue medilante ne trouuera elle point de limittes à ses iniures, tu accuse ce grand corps d'injustice, tu iniurie tant de sages & prudens Senateurs de qui la pourpre seul esbloüit les yeux des estrangers qui les regardent, Senateurs que ie peux nommer les Deitez de la France, & Dieux tutelaires de ce Royaume, qui tiennēt en main l'Vrne sacree de Minos, Senateurs de qui l'equitable iustice engendre la terreur dans le cœur des meschans, & vn desir ardent dans l'ame des bons, de se porter aux actions iustes, loüables, & raisonnables, Senateurs dis-je les premiers Piliers de ceste republique & de qui se forme & se compose cest assemblage harmonieux des trois estats, & tu es si impudent de toucher ceste corde, ne crains tu point les pointes de leur iustes couroux, leur gravité, leur port majestueux, leur iustice admirable, ne te versent ils aucune crainte de les iniurier. Esprit crud & indigeste ame cacochime, & qui desaduouë par tes actions le nom de vray & naturel François. Tu ne sçais pas que la nature t'a donné deux oreilles & vne seule lāgue t'apprenant sourdement qu'il faut beaucoup entendre & peu parler, mais tu n'as gueres prattiqué ces preceptes, & tesmoigne biē par les discours que tu es vain & de peu de iugement, en fin pour epilogue de la Reformation, tu veux renuerser tout l'orde & l'economie de ce Royaume à quoy

vouloir respondre outre qu'il seroit inutile &  
que la raison me dicte le contraire il faudroit  
vn liure entier, & faire autant de ligne qu'il y a  
de mots dans ta Reforme, où ie ne me veux  
obliger, puis qu'à lauer la teste d'un asne on n'y  
perd que la lessive.

F I N.





